

Y BEIBL
CYMRAEG NEWYDD
Argraffiad Diwygiedig

CYNNWYS

| | |
|-----------------------------------|----------------|
| | <i>Tudalen</i> |
| Rhagair i Argraffiad 1988 | iii |
| Rhagair i'r Argraffiad Diwygiedig | v |
| Mapiau | ix |
| Rhagarweiniad Cyffredinol | xi |

YR HEN DESTAMENT

| | |
|---------------------------------------|--------|
| Rhagarweiniad i'r Hen Destament | xxix |
| Mesurau a Phwysau yn yr Hen Destament | xxxiii |

| <i>Enw'r Llyfr</i> | <i>Talfyriad</i> | |
|----------------------------|------------------|-----|
| Llyfr Genesis | Gen. | 1 |
| Llyfr Exodus | Ex. | 49 |
| Llyfr Lefiticus | Lef. | 90 |
| Llyfr Numeri | Num. | 119 |
| Llyfr Deuteronomium | Deut. | 160 |
| Llyfr Josua | Jos. | 197 |
| Llyfr y Barnwyr | Barn. | 220 |
| Llyfr Ruth | Ruth | 245 |
| Llyfr Cyntaf Samuel | 1 Sam. | 248 |
| Ail Llyfr Samuel | 2 Sam. | 280 |
| Llyfr Cyntaf y Brenhinoedd | 1 Bren. | 308 |
| Ail Llyfr y Brenhinoedd | 2 Bren. | 338 |
| Llyfr Cyntaf y Cronicl | 1 Cron. | 367 |
| Ail Llyfr y Cronicl | 2 Cron. | 394 |
| Llyfr Esra | Esra | 428 |
| Llyfr Nehemeia | Neh. | 437 |
| Llyfr Esther | Esth. | 451 |
| Llyfr Job | Job | 459 |
| Llyfr y Salmu | Salm. | 490 |
| Llyfr y Diarhebion | Diar. | 576 |
| Llyfr y Pregethwr | Preg. | 605 |
| Caniad Solomon | Can. | 613 |
| Llyfr Eseia | Es. | 619 |
| Llyfr Jeremeia | Jer. | 683 |
| Llyfr Galarnad | Galar. | 745 |
| Llyfr Eseciel | Esec. | 752 |
| Llyfr Daniel | Dan. | 803 |
| Llyfr Hosea | Hos. | 817 |
| Llyfr Joel | Jl. | 827 |
| Llyfr Amos | Am. | 831 |
| Llyfr Obadeia | Ob. | 838 |
| Llyfr Jona | Jon. | 840 |
| Llyfr Micha | Mic. | 842 |
| Llyfr Nahum | Nah. | 848 |
| Llyfr Habacuc | Hab. | 850 |
| Llyfr Seffaneia | Seff. | 853 |
| Llyfr Haggai | Hag. | 856 |
| Llyfr Sechareia | Sech. | 858 |
| Llyfr Malachi | Mal. | 867 |



MESURAU A PHWYSAU YN YR HEN DESTAMENT

Ni cheisiwyd, yn y testun nac yn y troednodiadau, drosi mesurau Hebreig i fesurau cyfwerth yn y dull metrig. Gwaith anodd, onid amhosibl, yw cyfleu'n gwbl bendant union werth y mesurau y cyfeirir atynt yn yr Hen Destament, gan eu bod yn amrywio o le i le ac o bryd i'w gilydd. Sylwer hefyd y defnyddir dau fesur 'cufydd', y naill yn gyffredin a'r llall yn hen fesur (2 Cron.3:3); yr oedd hefyd ddau 'mina' a dau 'sicl', y naill yn ôl 'pwysau'r marchnatwyr' (Gen.23:16) a'r llall yn 'sicl y cysegr' (Ex.30:13). Gan fod sawl dull o bennu cyfwerthedd, ceir bod amrywiaeth mawr yn y rhestrau sydd ar gael. O gofio mai bras amcan yn unig sy'n bosibl, lluniwyd y rhestr hon yn bennaf ar sail yr un a roddir yn *The Oxford Companion to the Bible* (1993). Cynhwysir un cyfeiriad beiblaidd gyda phob un o'r mesurau a phwysau.

1. Mesurau Llinellol

| | | | |
|-----------|---|-------------|------------|
| modfedd | lled bys | 1 Bren.7:15 | 0.019 medr |
| dyrnfedd | cledr llaw (4 bys) | Esec.40:5 | 0.074 medr |
| rhychwant | blaen y bawd i flaen y bys bach (3 dyrnfedd) | 1 Sam.17:5 | 0.221 medr |
| cufydd | o'r penelin i flaen y bysedd (6 dyrnfedd) | Barn.3:16 | 0.443 medr |
| cufydd | yr hen fesur (7 dyrnfedd) | 2 Cron.3:3 | 0.520 medr |

2. Mesurau Cynhwysedd Sych

| | | | |
|----------------------------|-------------------|-------------|------------|
| pwys (Hebraeg <i>qab</i>) | | 2 Bren.6:15 | 1.3 litr |
| omer | degfed ran o effa | Ex.16:32 | 2.3 litr |
| hobaid | 3 omer a hanner | 1 Sam.25:18 | 7.7 litr |
| effa | 10 omer | Ex.16:36 | 22.9 litr |
| corus | 10 effa | 1 Bren.4:22 | 229.7 litr |
| homer | 10 effa | Esec.45:11 | 229.7 litr |

3. Mesurau Cynhwysedd Gwlyb

| | | | |
|-------|---------|------------|------------|
| log | | Lef.14:10 | 0.32 litr |
| hin | 12 log | Num.15:7 | 3.829 litr |
| bath | 6 hin | Esec.45:14 | 23 litr |
| corus | 10 bath | Esec.45:14 | 230 litr |

4. Pwysau

| | | | |
|--------|--------------------|--------------|-------------|
| gera | | Esec.45:12 | 0.57 gram |
| beca | 10 gera (1/2 sicl) | Ex.38:26 | 5.71 gram |
| sicl | 20 gera | Lef.27:25 | 11.42 gram |
| mina | 50 sicl | 1 Bren.10:17 | 571.2 gram |
| mina | 60 sicl | Esec.45:12 | 582.62 gram |
| talent | 60 mina | Ex.38:25 | 34.3 cgr |

5. Arian

Pwysau o fetalau a ddefnyddid yn arian yng nghyfnod yr Hen Destament, ac felly defnyddir 'sicl' (2 Bren.15:20) a 'talent' (1 Bren. 9:14) i ddynodi pwysau o aur neu arian a ddefnyddid i farchnata. Mewn rhannau sy'n perthyn i gyfnod diweddar yn llenyddiaeth yr Hen Destament cyfeirir at ddau ddarn arall o arian:

| | | | |
|---------|--|-------------|----------|
| daric | | 1 Cron.29:7 | 8 gram |
| dracmon | | Neh.7:70 | 4.4 gram |

GENESIS

Hanes y Creu

1 Yn y dechreuad creodd Duw y nefoedd a'r ddaear. ² Yr oedd y ddaear yn afluniaidd a gwag, ac yr oedd tywyllwch ar wyneb y dyfnder, ac ysbryd Duw* yn ymsymud ar wyneb y dyfroedd.

³ A dywedodd Duw, "Bydded goleuni." A bu goleuni. ⁴ Gwelodd Duw fod y goleuni yn dda; a gwahanodd Duw y goleuni oddi wrth y tywyllwch. ⁵ Galwodd Duw y goleuni yn ddydd a'r tywyllwch yn nos. A bu hwyr a bu bore, y dydd cyntaf.

⁶ Yna dywedodd Duw, "Bydded ffurfafen yng nghanol y dyfroedd yn gwahanu dyfroedd oddi wrth ddyfroedd."

⁷ A gwnaeth Duw y ffurfafen, a gwahanodd y dyfroedd odani oddi wrth y dyfroedd uwchlaw iddi. A bu felly.

⁸ Galwodd Duw y ffurfafen yn nefoedd. A bu hwyr a bu bore, yr ail ddydd.

⁹ Yna dywedodd Duw, "Casgler ynghyd y dyfroedd dan y nefoedd i un lle, ac ymddangosed tir sych." A bu felly.

¹⁰ Galwodd Duw y tir sych yn ddaear, a chronfa'r dyfroedd yn foroedd. A gwelodd Duw fod hyn yn dda. ¹¹ Dywedodd Duw,

"Dyged y ddaear dyfiant, llyisiau yn dwyn had, a choed ir ar y ddaear yn dwyn ffrwyth â had ynddo, yn ôl eu rhywogaeth." A bu felly. ¹² Dygodd y

ddaear dyfiant, llyisiau yn dwyn had yn ôl eu rhywogaeth, a choed yn dwyn ffrwyth â had ynddo, yn ôl eu rhywogaeth. A gwelodd Duw fod hyn yn dda. ¹³ A bu hwyr a bu bore, y trydydd dydd.

¹⁴ Yna dywedodd Duw, "Bydded goleuadau yn ffurfafen y nefoedd i wahanu'r dydd oddi wrth y nos, ac i fod yn arwyddion i'r tymhorau, a hefyd i'r dyddiau a'r blynyddoedd. ¹⁵ Bydded iddynt fod yn oleuadau yn ffurfafen y nefoedd i oleuo ar y ddaear." A bu felly.

¹⁶ Gwnaeth Duw y ddau olau mawr, y golau mwyaf i reoli'r dydd, a'r golau lleiaf y nos; a gwnaeth y sêr hefyd. ¹⁷ A

gosododd Duw hwy yn ffurfafen y nefoedd i oleuo ar y ddaear, ¹⁸ i reoli'r dydd a'r nos ac i wahanu'r goleuni oddi wrth y tywyllwch. A gwelodd Duw fod hyn yn dda. ¹⁹ A bu hwyr a bu bore, y pedwerydd dydd.

²⁰ Yna dywedodd Duw, "Heigied y dyfroedd o greaduriaid byw, ac uwchlaw'r ddaear eheded adar ar draws ffurfafen y nefoedd." ²¹ A chreodd Duw y morfilod mawr, a'r holl greaduriaid byw sy'n heigio yn y dyfroedd yn ôl eu rhywogaeth, a phob aderyn asgellog yn ôl ei rywogaeth. A gwelodd Duw fod hyn yn dda. ²² Bendithiodd Duw hwy a dweud, "Byddwch ffrwythlon ac amlhewch a llanwch ddyfroedd y moroedd, a lluosoged yr adar ar y ddaear." ²³ A bu hwyr a bu bore, y pumed dydd.

²⁴ Yna dywedodd Duw, "Dyged y ddaear greaduriaid byw yn ôl eu rhywogaeth: anifeiliaid, ymlusgiaid a bwystfilod gwyllt yn ôl eu rhywogaeth." A bu felly. ²⁵ Gwnaeth Duw y bwystfilod gwyllt yn ôl eu rhywogaeth, a'r anifeiliaid yn ôl eu rhywogaeth, a holl ymlusgiaid y tir yn ôl eu rhywogaeth. A gwelodd Duw fod hyn yn dda.

²⁶ Dywedodd Duw, "Gwnawn ddyng ar ein delw, yn ôl ein llun ni, i lywodraethu ar bysgod y môr, ar adar yr awyr, ar yr anifeiliaid gwyllt, ar yr holl ddaear, ac ar bopeth sy'n ymlusgo ar y ddaear."

²⁷ Felly creodd Duw ddyng ar ei ddelw ei hun; ar ddelw Duw y creodd ef; yn wryw ac yn fenyw y creodd hwy.

²⁸ Bendithiodd Duw hwy a dweud, "Byddwch ffrwythlon ac amlhewch, llanwch y ddaear a darostyngwch hi; llywodraethwch ar bysgod y môr, ar adar yr awyr, ac ar bopeth byw sy'n ymlusgo ar y ddaear."

²⁹ A dywedodd Duw, "Yr wyf yn rhoi i chwi bob llysieuyn sy'n dwyn had ar wyneb y ddaear, a phob coeden â had yn ei ffrwyth; byddant yn fwyd i chwi.

³⁰ Ac i bob bwystfil gwyllt, i holl adar yr

awyr, ac i bopeth sy'n ymlusgo ar y ddaear, popeth ag anadl einioes ynddo, bydd pob llysiegun glas yn fwyd." A bu felly. ³¹ Gwelodd Duw y cwbl a wnaeth, ac yr oedd yn dda iawn. A bu hwyr a bu bore, y chweched dydd.

2 Felly gorffennwyd y nefoedd a'r ddaear a'u holl luoedd. ² Ac erbyn y seithfed dydd yr oedd Duw wedi gorffen y gwaith a wnaeth, a gorffwysodd ar y seithfed dydd oddi wrth ei holl waith. ³ Am hynny bendithiodd Duw y seithfed dydd a'i sancteiddio, am mai ar hwnnw y gorffwysodd Duw oddi wrth ei holl waith yn creu.

⁴ Dyma hanes cenhedlu'r nefoedd a'r ddaear pan grewyd hwy.

Gardd Eden

Yn y dydd y gwnaeth yr ARGLWYDD Dduw ddaear a nefoedd, ⁵ nid oedd un o blanhigion y maes wedi dod ar y tir, nac un o lysiau'r maes wedi blaguro, am nad oedd yr ARGLWYDD Dduw eto wedi peri iddi lawio ar y ddaear, ac nad oedd yno ddyn i drin y tir; ⁶ ond yr oedd tarth yn esgyn o'r ddaear ac yn dyfrhau holl wyneb y tir. ⁷ Yna lluniodd yr ARGLWYDD Dduw ddyn o lwch y tir, ac anadlodd yn ei ffröenau anadl einioes; a daeth y dyn yn greadur byw. ⁸ A phlannodd yr ARGLWYDD Dduw ardd yn Eden, tua'r dwyrain; a gosododd yno y dyn yr oedd wedi ei lunio. ⁹ A gwnaeth yr ARGLWYDD Dduw i bob coeden ddymunol i'r golwg, a da i fwyta ohoni, dyfu o'r tir; ac yr oedd pren y bywyd yng nghanol yr ardd, a phren gwybodaeth da a drwg.

¹⁰ Yr oedd afon yn llifo allan o Eden i ddyfrhau'r ardd, ac oddi yno yr oedd yn ymrannu'n bedair. ¹¹ Enw'r afon gyntaf yw Pison; hon sy'n amgylchu holl wlad Hafila, lle y ceir aur; ¹² y mae aur y wlad honno'n dda, ac yno ceir bdeliwm a'r maen onyx. ¹³ Enw'r ail yw Gihon; hon sy'n amgylchu holl wlad Ethiopia. ¹⁴ Ac enw'r drydedd yw Tigris; hon sy'n llifo o'r tu dwyrain i Asyria. A'r bedwaredd afon yw Ewfrates.

¹⁵ Cymerodd yr ARGLWYDD Dduw y dyn a'i osod yng ngardd Eden, i'w thrin a'i chadw. ¹⁶ Rhoddodd yr ARGLWYDD

Dduw orchymyn i'r dyn, a dweud, "Cei fwyta'n rhydd o bob coeden yn yr ardd, ¹⁷ ond ni chei fwyta o bren gwybodaeth da a drwg, oherwydd y dydd y bwytai ohono ef, byddi'n sicr o farw."

¹⁸ Dywedodd yr ARGLWYDD Dduw hefyd, "Nid da bod y dyn ar ei ben ei hun; gwnaf iddo ymgeledd cymwys." ¹⁹ Felly fe luniodd yr ARGLWYDD Dduw o'r ddaear yr holl fwystfilod gwyllt a holl adar yr awyr, a daeth â hwy at y dyn i weld pa enw a roddai arnynt; a pha enw bynnag a roes y dyn ar unrhyw greadur, dyna fu ei enw. ²⁰ Rhoes y dyn enw ar yr holl anifeiliaid, ar adar yr awyr, ac ar yr holl fwystfilod gwyllt; ond ni chafodd ymgeledd cymwys iddo'i hun. ²¹ Yna parodd yr ARGLWYDD Dduw i drymgwsg syrthio ar y dyn, a thra oedd yn cysgu, cymerodd un o'i asennau a chau ei lle â chnawd; ²² ac o'r asen a gymerodd gwnaeth yr ARGLWYDD Dduw wraig, a daeth â hi at y dyn. ²³ A dywedodd y dyn,

"Dyma hi!

Asgwrn o'm hesgyrn, a chnawd o'm cnawd.

Gelwir hi yn wraig,

am mai o ŵr* y cymerwyd hi."

²⁴ Dyna pam y bydd dyn yn gadael ei dad a'i fam, ac yn glynu wrth ei wraig, a byddant yn un cnawd. ²⁵ Yr oedd y dyn a'i wraig ill dau yn noeth, ac nid oedd arnynt gwilydd.

Anufudd-dod Dyn

3 Yr oedd y sarff yn fwy cyfrwys na'r holl fwystfilod gwyllt a wnaed gan yr ARGLWYDD Dduw. A dywedodd wrth y wraig, "A yw Duw yn wir wedi dweud, 'Ni chewch fwyta o'r un o goed yr ardd?'" ² Dywedodd y wraig wrth y sarff, "Cawn fwyta o ffrwyth coed yr ardd, ³ ond am ffrwyth y goeden sydd yng nghanol yr ardd dywedodd Duw, 'Peidiwch â bwyta ohono, na chyffwrdd ag ef, rhag ichwi farw.'" ⁴ Ond dywedodd y sarff wrth y wraig, "Na! ni fyddwch farw; ⁵ ond fe ŵyr Duw yr agorir eich llygaid y dydd y bwytewch ohono, a byddwch fel Duw*

2:23 Hebraeg yn chwarae ar y geiriau 'issa (gwraig) ac 'is (gŵr).

3:5 Neu, duwiau.

yn gwybod da a drwg.” ⁶ A phan ddeallodd y wraig fod y pren yn dda i fwyta ohono, a'i fod yn deg i'r golwg ac yn bren i'w ddymuno i beri doethineb, cymerodd o'i ffrwyth a'i fwyta, a'i roi hefyd i'w gŵr oedd gyda hi, a bwytaodd yntau. ⁷ Yna agorwyd eu llygaid hwy ill dau i wybod eu bod yn noeth, a gwniasant ddail ffigysbren i wneud ffedogau iddynt eu hunain.

⁸ A chlywsant sŵn yr ARGLWYDD Dduw yn rhodio yn yr ardd gyda hwyr y dydd, ac ymguddiodd y dyn a'i wraig o olwg yr ARGLWYDD Dduw ymysg coed yr ardd. ⁹ Ond galwodd yr ARGLWYDD Dduw ar y dyn, a dweud wrtho, “Ble'r wyt ti?” ¹⁰ Atebodd yntau, “Clywais dy sŵn yn yr ardd, ac ofnais oherwydd fy mod yn noeth, ac ymguddiais.” ¹¹ Dywedodd yntau, “Pwy a ddywedodd wrthynt dy fod yn noeth? A wyt ti wedi bwyta o'r pren y gorchmynnais iti beidio â bwyta ohono?” ¹² A dywedodd y dyn, “Y wraig a roddaist i fod gyda mi a roes i mi o ffrwyth y pren, a bwyteais innau.” ¹³ Yna dywedodd yr ARGLWYDD Dduw wrth y wraig, “Pam y gwnaethost hyn?” A dywedodd y wraig, “Y sarff a'm twyllodd, a bwyteais innau.”

Defdryd Duw

¹⁴ Yna dywedodd yr ARGLWYDD Dduw wrth y sarff:

“Am iti wneud hyn, yr wyt yn fwy
melltigedig
na'r holl anifeiliaid,
ac na'r holl fwystfilod gwyllt;
byddi'n ymlusgo ar dy dor,
ac yn bwyta llwch holl ddyddiau dy
fywyd.

¹⁵ Gosodaf elyniaeth hefyd rhyngot ti
a'r wraig,
a rhwng dy had di a'i had hithau;
bydd ef yn ysigo dy ben di,
a thithau'n ysigo'i sawdl ef.”

¹⁶ Dywedodd wrth y wraig:

“Byddaf yn amlhau yn ddirfawr dy
boen a'th wewyr;
mewn poen y byddi'n geni plant.
Eto bydd dy ddyhead am dy ŵr,
a bydd ef yn llywodraethu arnat.”

¹⁷ Dywedodd wrth Adda:

“Am iti wrando ar lais dy wraig,
a bwyta o'r pren y gorchmynnais i ti
beidio â bwyta ohono,
melltigedig yw'r ddaear o'th achos;
trwy lafur y bwyteit ohoni holl
ddyddiau dy fywyd.

¹⁸ Bydd yn rhoi iti ddrain ac ysgall, a
byddi'n bwyta llysiau gwyllt.

¹⁹ Trwy chwys dy wyneb y byddi'n
bwyta bara

hyd oni ddychweli i'r pridd,
oherwydd ohono y'th gymerwyd;
llwch wyt ti, ac i'r llwch y dychweli.”

²⁰ Rhoddodd y dyn i'w wraig yr enw Efa,
am mai hi oedd mam pob un byw. ²¹ A
gwnaeth yr ARGLWYDD Dduw beisiau
crwyn i Adda a'i wraig, a'u gwisgo
amdanynt.

²² Yna dywedodd yr ARGLWYDD Dduw,
“Edrychwch, y mae'r dyn fel un
ohonon ni, yn gwybod da a drwg. Yn
awr, rhaid iddo beidio ag estyn ei law a
chymryd hefyd o bren y bywyd, a bwyta,
a byw hyd byth.” ²³ Am hynny anfonodd
yr ARGLWYDD Dduw ef allan o ardd
Eden, i drin y tir y cymerwyd ef ohono.
²⁴ Gyrrodd y dyn allan; a gosododd
gerwbiaid i'r dwyrain o ardd Eden, a
chleddyf fflamlyd yn chwyrlio, i
warchod y ffordd at bren y bywyd.

Cain ac Abel

4 Cafodd Adda gyfathrach â'i wraig
Efa, a beichiogodd ac esgor ar Cain,
a dywedodd, “Dygais* ŵr trwy yr
ARGLWYDD.” ² Esgorodd wedyn ar ei
frawd Abel. Bugail defaid oedd Abel, a
Cain yn trin y tir. ³ Ymhen amser daeth
Cain ag offrwm o gynnyrch y tir i'r
ARGLWYDD, ⁴ a daeth Abel yntau â
blaenffrwyth ei ddefaid, sef eu braster.
⁵ Edrychodd yr ARGLWYDD yn ffafriol ar
Abel a'i offrwm, ond nid felly ar Cain a'i
offrwm. Digiodd Cain yn ddirfawr, a bu'n
wynepdrist. ⁶ Ac meddai'r ARGLWYDD
wrth Cain, “Pam yr wyt wedi digio? Pam
yr wyt yn wynepdrist? ⁷ Os gwnei yn
dda, oni fyddi'n gymeradwy? Ac oni
wnei yn dda, y mae pechod yn llercian

wrth y drws; y mae ei wanc amdanat, ond rhaid i ti ei drechu.”⁸ A dywedodd Cain wrth Abel ei frawd, “Gad inni fynd i'r maes.”* A phan oeddent yn y maes, troes Cain ar Abel ei frawd, a'i ladd.⁹ Yna dywedodd yr ARGLWYDD wrth Cain, “Ble mae dy frawd Abel?” Meddai yntau, “Ni wn i. Ai fi yw ceidwad fy mrawd?”¹⁰ A dywedodd Duw, “Beth wyt wedi ei wneud? Y mae llef gwaed dy frawd yn gweiddi arnaf o'r pridd.”¹¹ Yn awr, melltgedig fyddi gan y pridd a agorodd ei safn i dderbyn gwaed dy frawd o'th law.¹² Pan fyddi'n trin y pridd, ni fydd mwyach yn rhoi ei ffrwyth iti; ffoadur a chrwydryn fyddi ar y ddaear.”¹³ Yna meddai Cain wrth yr ARGLWYDD, “Y mae fy nghosb yn ormod i'w dwyn.”¹⁴ Dyma ti heddiw yn fy ngyrru ymaith o'r tir, ac fe'm cuddir o'th wýdd; ffoadur a chrwydryn fyddaf ar y ddaear, a bydd pwy bynnag a ddaw ar fy nhraws yn fy lladd.”¹⁵ Dywedodd yr ARGLWYDD wrtho, “Nid felly*; os bydd i rywun ladd Cain, dielir arno seithwaith.” A gosododd yr ARGLWYDD nod ar Cain, rhag i neb a ddôl ar ei draws ei ladd.¹⁶ Yna aeth Cain ymaith o wýdd yr ARGLWYDD, a phreswyllo yn nhir Nod, i'r dwyrain o Eden.

Disgynyddion Cain

¹⁷ Cafodd Cain gyfathrach â'i wraig, a beichiogodd ac esgor ar Enoch; ac adeiladodd ddinas, a'i galw ar ôl ei fab, Enoch.¹⁸ Ac i Enoch ganwyd Irad; Irad oedd tad Mehwiael, Mehwiael oedd tad Methwsael, a Methwsael oedd tad Lamech.¹⁹ Cymerodd Lamech ddwy wraig; Ada oedd enw'r gyntaf, a Sila oedd enw'r ail.²⁰ Esgorodd Ada ar Jabal; efd oedd tad pob preswlydd pabell a pherchen anifail.²¹ Enw ei frawd oedd Jwbal; efd oedd tad pob canwr telyn a phib.²² Esgorodd Sila, y wraig arall, ar Twbal-Cain, cyfarwyddwr pob un sy'n gwneud cywreinwaith pres a haearn. Naama oedd chwaer Twbal-Cain.

²³ A dywedodd Lamech wrth ei wragedd:

“Ada a Sila, clywch fy llais;

chwi wragedd Lamech, gwrandewch fy lleferydd;
lleddais ŵr am fy archolli, a llanc am fy nghleisio.

²⁴ Os dielir am Cain seithwaith, yna Lamech saith ddengwaith a seithwaith.”

Seth ac Enos

²⁵ Cafodd Adda gyfathrach â'i wraig eto, ac esgorodd ar fab, a'i alw'n Seth, a dweud, “Darparodd* Duw i mi fab arall yn lle Abel, am i Cain ei ladd.”²⁶ I Seth hefyd fe anwyd mab, a galwodd ef yn Enos. Yr amser hwnnw y dechreuwyd galw ar enw yr ARGLWYDD.

Disgynyddion Adda

5¹ Cron. 1:1☞
Dyma lyfr cenedlaethau Adda*. Pan greodd Duw bobl, gwnaeth hwy ar lun Duw.² Fe'u creodd yn rywre ac yn fenyw, a bendithiodd hwy; ac ar ddydd eu creu fe'u galwodd yn ddyn.³ Bu Adda fyw am gant tri deg o flynyddoedd cyn geni mab iddo, ar ei lun a'i ddelw; a galwodd ef yn Seth.⁴ Wedi geni Seth, bu Adda fyw am wyth gan mlynedd, a bu iddo feibion a merched eraill.⁵ Felly yr oedd oes gyfan Adda yn naw cant tri deg o flynyddoedd; yna bu farw.

⁶ Bu Seth fyw am gant a phump o flynyddoedd cyn geni iddo Enos.⁷ Ac wedi geni Enos, bu Seth fyw am wyth gant a saith o flynyddoedd, a bu iddo feibion a merched eraill.⁸ Felly yr oedd oes gyfan Seth yn naw cant a deuddeg o flynyddoedd; yna bu farw.

⁹ Bu Enos fyw am naw deg o flynyddoedd cyn geni iddo Cenan.¹⁰ Ac wedi geni Cenan, bu Enos fyw am wyth gant a phymtheg o flynyddoedd, a bu iddo feibion a merched eraill.¹¹ Felly yr oedd oes gyfan Enos yn naw cant a phump o flynyddoedd; yna bu farw.

¹² Bu Cenan fyw am saith deg o flynyddoedd cyn geni iddo Mahalalel.¹³ Ac wedi geni Mahalalel, bu Cenan fyw am wyth gant pedwar deg o flynyddoedd, a bu iddo feibion a merched eraill.¹⁴ Felly yr oedd oes

4:8 Felly Fersiynau. Hebraeg heb “Gad . . . maes.”

4:15 Felly Fersiynau. Hebraeg, Felly.

4:25 Hebraeg, sith. Cymh. Seth.

5:1 Neu, dyn.